
Ukuziphendulela kubahlaziyi besiZulu

Berrington Xolani Siphosakhe Ntombela 

University of Limpopo, South Africa

E-mail: Berrington.Ntombela@ul.ac.za

IQOQA

Ukubhala ngezilimi zase-Afrikha kuhlala kuyinselelo ikakhulukazi uma ukubhala kwakho kuzokwahlulewa ngokusebenzisa indlelakubuka yolimi lwamakholoni. Lokhu kungenxa yokuthi izilimi ezihamba phambili emfundweni, njengesiNgisi, zengamela ukufunda nokubhala kwezemfundo, ngakho-ke yizo ezibeka imithetho yokubhala kwezemfundo nokuthi kufanele kwensiwe kanjani. Leli phepha lisekelwe emibonweni yabahlaziyi mayelana nesahluko esithunyelwe ukuze sishicilelwwe encwadini. Isahluko sibhalwe ngesiZulu kanti abahlaziyi babuye banikeza imibono yabo nangesiZulu. Ngakho-ke leli phepha liphenya le mibono lisebenzisa *i-autoethnography* evumela ukuthi 'uqobo' lo mcwaningi lube yingxeny eophenyo. Umcwaningi uphendula le mibono ukuze athole isisekelo sayo. Uhlaziyo lukhombisa ukuthi nakuba abahlaziyi beveze imibono ewusizo ukuze kuthuthukiswe isahluko, okunye ukuphawula kwabo kuveze ukungazi kwabo ngephuzu locwaningo elikhethwe umcwaningi. Isiphetho siwukuthi ukuphawula okusekelwe ekungazini kwabahlaziyi ngendlela yophenyo ekhethiwe yomcwaningi kungenzeka kudikibalise ababhali abangase bangabi nawo amandla okuzichaza kubahlaziyi.

Amatemu anqala: ukubhala kwezemfundo, imibono yomhlaziyi, ukubhala ngesiZulu, *i-autoethnography*, incazelo ewugqinsi

CITATION

Ntombela, B. (2024). Ukuziphendulela kubahlaziyi besiZulu. *Journal for Language Teaching*, 58(1), Article 6283. <https://doi.org/10.56285/jltVol58iss1a6283>

Responding to isiZulu reviewers

ABSTRACT

Writing in African languages remains a challenge, mainly when one's writing will be judged through the lenses of a colonial language. This is because the dominant languages in education, such as English, preside over academic literacy and dictate how academic writing should be carried out. This paper is based on the reviewers' comments about a chapter submitted for publication in a book. The chapter was written in isiZulu, and the reviewers provided their review. Therefore, this paper interrogates these comments using autoethnography, allowing the researcher's 'self' to be part of the investigation. The researcher responds to these comments in order to establish their basis. The analysis indicates that whilst the reviewers provided valuable comments for the improvement of the chapter, some of their comments revealed their ignorance about the research paradigm chosen by the researcher. The conclusion is that comments based on reviewers' ignorance of the researcher's preferred method of investigation are likely to discourage writers who might not have the energy to explain themselves to the reviewers.

Keywords: academic writing; reviewer's comments; writing in isiZulu; autoethnography; thick description

1. Isingeniso

Ukuthuthukiswa kwezilimi zabomdabu ukuze zilingane nezilimi zabamhlophe kungumqansa omelwe ukhushukwe abanini bolimi. Ingxene yokuthuthukisa izilimi zabomdabu ifaka ukuzisebenzisa ekubhaleni okuhlukahlukene okufaka ukubhala amaphepha ashicilelwu kumajenali kanye nezahluko ezishicilelwu ezincwadini. La maphepha kumele ahlaziyewe yilabo abongongoti ukuze kuqinisekiswe ukuthi asezingeni eliphezulu. Labo abathathwa njengongoti kuvamise ukuthi kube izifundiswa ezisebenza ezikhungweni zemfundo ephakeme. Izikhungo zemfundo ephakeme zinezinjulalwazi eziningi ezisetshenziswa izifundiswa njengeso lokubuka. Lokhu kunomthelela endleleni abahlaziya ngayo imibhalo ephambi kwabo. Isibonelo ukuthi lowo ogogode kwezenkolo, kunendlela yokubuka ehambisana nezinjulalwazi ezisebenza kulo mkhakha. Osuke egogode emkhakheni wezilimi naye uba nezinjulalwazi ezithile ezisetshenziswa kulowo mkhakha. Kuyaye kusale kumcwaningi ukuthi alungise njengokuncoma komhlaziyi noma aziphendulele uma kubonakala sengathi kukhona ukuphambana ekuhlaziyen komhlaziyi.

Lolu cwaningo lusebenzise indlela yokuzibheka (*autoethnography*). I-*autoethnography* iwuhlobo lokuphenya okucabangayo olubheka ulwazi lombali ngokwakhe ezimeni zemfundo, ezengqondo noma ezezenhlalo (Ellis, Adams & Bochner 2011; Maunganidze & Ruggunan 2021; Ntombela 2021). Ngaphezu kwalokho, u-Ellis nabanye (2010: isigaba 3) babheka i-*autoethnography* ‘njengenye yezindlela ezivumayo futhi ezivumela ukuzithoba, imizwa, kanye nomthelela womcwaningi ocwaningweni, kunokucasha kulezi zindaba noma ucabange ukuthi azikho.’ UNtombela (2021) ubuye akugcizelele ukuthi umlingiswa oyinhloko ku-*autoethnography* umcwaningi uqobo lwakhe.

Ucwaningo kuleli phepha lusukela emshikashikeni wokubhala isahluko esiyingxene ye yencwadi ethuthukisa izilimi zabomdabu. Njengomkhuba wokubhala ezifundisweni, isahluko kwakumele sihlaziyewe abahlaziyi abagcina bebatathu. Leli phepha libika ngokuziphendulela komcwaningi kubahlaziyi. Lokhu kwenziwa wukuthi kuvamisile ukuthi abahlaziyi babheke yonke imibhalo ngeso lokubhala ngesiNgisi. UJansen (2019), lapho ekhulumma ngenkinga yowlazi ekususweni kobukoloni, uthi into okunqakiswana ngayo e-Afrikha umbuzo wokuthi olukabani ulwazi oluqhakanjiswayo. Ngamanye amazwi, kuyenzeka ukuthi abahlaziyi baholwe ulwazi oluthile ekuhlaziyeni kwabo balushiye lolu umbhali alusebenzisile. Ngakho kulolu cwaningo ngibheka ukuthi kungabe amazwi abahlaziyi ayahambisana nolwazi lombali noma qha.

2. Ukubhala kwezemfundo

Ukubhala kocwaningo kanye nezincwadi kwezemfundo kusancike kakhulu olimini lwesiNgisi. Labo abafundisa izifundo zokufunda nokubhala emfundweni ephakeme bagcizelela ulimi lwesiNgisi. Lokhu kwenza ukuthi ukucabanga komuntu ofundile kulandele ukucabanga komuntu owazi isiNgisi. Kanti uSanon-Ouattara (2022) uthi imfundu ehlekile yalethwa e-Afrikha ukuze iphakamise umAfrikha abe sezingeni labanye abantu okuchaza ukuthi le mfundo yalethwa ukuze ikhiphe umAfrikha emongweni wamasiko akhe ifake usikompilo lwaseYurophu ukuze izinjongo zokubusa umAfrikha zifezakale. Ingxene enkulu umAfrikha abuswa ngayo yiyo le yokusetshenziswa kwezilimi zaseYurophu ukufunda nokufundisa ikakhulu emabangeni aphezulu (Ntombela 2023). Lokhu kusho ukuthi eNingizimu Afrikha, ukubhala kwezemfundo kulawulwa ulimi lwesiNgisi ngoba yilo olusetshenziswa ukufunda nokufundisa emfundweni ephakeme.

Ngaleyondlela ukuhlelwa kwendlela yokubhala izinhlobo eziningi zokubhala okufaka umbiko wocwaningo, izincwadi, i-*curriculum vitae*, nokuningi kuyatholakala emibhalweni kaBailey (2006), uGillett, uHammond noMartala (2009) kanye

noBeekman, uDube, uPotgieter, no-Underhill (2016). Ngenxa yokuthi lezi zincwadi zifundwa abafundi abaningi emfundweni ephakeme ukuze bakwazi ukubhala kwezemfundo, kulindelekile ukuthi kube nomthelela uma sebebhala nangezilimi zomdabu. Nalabo abahlaziya imibhalo ebhalwe ngezilimi zabomdabu, kuyenzeka basebenzise ulwazi oluqukethwe kulezi zincwadi.

Uma singenza isibonelo, uGillett nabanye (2009) babalula indlela iquoqo okumelwe libhalwe ngayo okufaka lokhu okulandelayo: qala ngokunikeza isizinda solwazi; bese uchaza inhloso enkulu yocwaningo; lokhu kuzolandelwa isifinyezo sendlela yokusebenza esetshenzisiwe; imiphumela ebalulekile izolandela; bese uhlola le miphumela; ekugcineni, chaza kafushane iziphetho, ezingase zihlanganise izincomo. Lokhu kuchaza ukuthi umhlaziyi onalolu lwazi, uyobheka ukuthi umbhali uzilandele zonke lezi zinyathelo. Njengalokhu uGillett nabanye (2009) bekubalula ukuthi lezi zinyathelo ezilandelwayo uma ubhala iquoqo ziyanana nalezo ezilandelwa uma ubhala umbiko wocwaningo. Ngaleyo ndlela futhi, umhlaziyi onalolu lwazi uyobheka ukuthi umbhali uzilandele zonke lezi zinyathelo.

3. Indlela yalolu cwaningo

Leli phepha lihlaziya izincomo zabahlaziyi besahluko okwakumele samukelwe njengengxene yebhuku elithuthukisa izilimi zabomdabu. Isahluko sasibhalwe ngesiZulu sabe sesihlaziwa abahlaziyi abathathu. Bobathathu abahlaziyi basebenzisa ikhompyutha ukubhala imibono yabo. Lapha ngicaphune imibono yomhlaziyi ngamunye, ngiqa la ngowokuqala ngiye kowesibili ngigcine ngowesithathu, emva kwalokho ngabe sengiphendula ngeyami imibono kulokho okushiwo umhlaziyi. Lokhu kuyahambisana *ne-autoethnography* njengalokhu sibalulile ngenhla. Ngisebenzise utsheku ukukhombisa imibono yomhlaziyi ngamunye ngasebenzisa nenombolo ukukhombisa ukulandelana kwemibono.

4. Umhlaziyi wokuqala

[1.1]

Isihloko sidinga ukuhlelwa kabusha

Isib: Ukubaluleka kokusetshenziswa kwezilimi ezahlukahlukene ekufundiseni umntwana e-Ningizimu Afrikha

Kuyinto ejwayelekile ukuthi abahlaziyi bancome izindlela ezechlukene ongamisa ngazo isihloko sakho. Isihloko sibalulekile ngoba sigoqa ucwaningo sibe umlahlandlela okhombisa ukuthi ukhulumu ngani embhalweni wakho. Lokhu kuhlelwa kabuhla

kwesihloko okulethwa umhlaziyi kulethe amagama ambalwa angekho esahlukweni: ukubaluleka, ukusetshenzisa, eNingizimu. Isihloko umhlaziyi afuna siguqulwe sikhuluma ngokwehlukahlukana kwezilimi ekufundiseni umntwana wase-Afrikha. Lezi zihloko zihlobene kodwa azifani ncimishi. Isihloko somcwaningi asikuvezi ukuthi kukhulunywa ngokusetshenzisa noma ngokubaluleka kodwa sibalisa ngokuthi kunezilimi ezahlukene uma ubheka ukufunda komntwana e-Afrikha.

Umhlaziyi ubuye waphongoza iNingizimu mhlawumbe ngoba ebona i-Afrikha inkulu kakhulu ukuthi umcwaningi angabhala ngayo esihlokweni. Iqiniso, noma kunjalo, ukuthi umntwana waseNingizimu Afrikha ungumAfrikha. Mhlawumbe isihloko singaguqulwa sithi Ukusetshenzisa kwezilimi ezahlukene ekufundiseni umntwana wase-Afrikha. Lo mbono womhlaziyi unikeza ithuluzi elibalulekile ukusiza umbhalo ugeleze kahle kusuka esihlokweni kuya kokusemzimbeni.

[1.2]

Kufanele iqoqa liqale ngesendlalelo sesihloko okuyikhona okwenze waba nogqozi lokubhala ngalesi sihloko, bese ubika ngesihloko obhala ngaso.

Isib: E-Afrikha yonkana naseNingizimu Afrikha kunezilimi zomdabu eziningi ezikhulunywa izizwe ezahlukene. Umntwana uma eqala ukukhuluma ufunda ulimi olukhulunywa ekhaya. Ebangeni lokuya esikoleni, uqala afundiswe ngolimi lwasekhaya. Ukuqonda izifundo kuncike olimini lomntwana lwasekhaya. Inhlosos Lolu cwaningo kuhlonza ukubaluleka kokufundiswa kwabantwana ngezilimi zabo zomdabu. Idlela yokwenza ucwaningo... injulalwazi... okuzuze ucwaningo... Zonke lezi zigaba azivele ngaphansi kweqoqa locwaningo

Iqoqa libalulekile ekufingqeni ucwaningo. Ezikhathini eziningi abamema ababhalu bamaphepha bajwayele ukucela ukubona iqoqa kuqala bese benquma ukuthi liyahambisana yini nalokho abazimisele ukukushicilela. Ngaleylo ndlela abanye babalula izindlela ezithile abafisa iqoqa lakho limiswe ngazo. Kusobala ukuthi lomhlaziyi unendlela ethile alindele ukuthi iqoqa lime ngayo ethi ayihambisane nale ebalulwa uGillett nabanye (2009). Lokhu okushiwo umhlaziyi akulona iphutha. Maningi amajenali asebenzisa le ndlela ebalulwa umhlaziyi. Kepha kumelwe kucaciswe ukuthi akuyona yodwa idlela yokubhala iqoqa. Idlela umuntu abhala ngayo iqoqa kumelwe ilawulwe idlela ucwaningo olumi ngayo. Ucwaningo olwenziwe ngokuthola iminingwane kubabambiqhaza ngokusebenza (*empirical*) alufani ncimishi nocwaningo olwenziwa ngokusebenza uhleli phansi (*desktop*). Idlela futhi abantu ababhalu ngayo ayifani okwenza kuhluke idlela iqoqa elimi ngayo. Uma kungabekwanga idlela ethile iqoqa okumele lime ngayo, umbhalu uvumelekile ukuqoqa ucwaningo lwakhe ngendlela abona ngayo. Ngakolunye uhlangothi kuyinto

encomekayo ukuthi umhlaziyi unikeze isibonelo sendlela iquoq a okumele lime ngayo, kanti ngakolunye kunikeza isithombe sokuthi umbhali akazi lutho usadinga ukucathuliswa. Lo mbono womhlaziyi singawufaka ngaphansi kwamathuluzi abalulekile ekubhaleni iphepha elibika ngocwaningo.

[1.3]

Lawa mandla; Ngaleyo ndlela; Lesi sahluko

Lapha umhlaziyi ucacisa ngendlela isiZulu esibhalwa ngayo. Isabizwana sokukhomba sibhalwe sahlukana nebizo. Lena yindlela okubhalwa ngayo nakuba bekubhalwa kuhlanganiswe esikhathini esedlule. Lokhu kakhombisa ukubaluleka kokulandela ushintsho olukhona olulethwa ukuvamisa ekubhalweni kolimi lwesiZulu. Lo mbono womhlaziyi ungena ngaphansi kwezinsiza zokubhala ngendlela eyamukelekile.

[1.4]

Igama eliyisihlanganiso alikwazi ukuba sekuqaleni emshweni.

Lapha umhlaziyi uphawula ngokusetshenziswa kolimi. Ziningi izindlela izingcweti zolimi ezizilandelayo uma kuhlaziya ukusetshenziswa kolimi. Indlela evamile futhi esetshenziswa ukufundiseni ulimi ezikoleni yileyo ebalula indlela okumelwe ilandelwe uma kubhalwa. Le ndlela idweba umgwaqo okumele ulandelwe abasebenzisi bolimi ekubhaleni. Kumele siphawule nokho ukuthi akusiyona yodwa le ndlela okumelwe kubhekwe ngayo ukusetshenziswa kolimi. Enye indlela ebalulekile ebheka indlela abakhulumi bolimi abalusebenzisa ngayo bese ikufaka lokho ekubhalweni kolimi. Okwenza lo mbono womhlaziyi ube ngolandelwayo wukuthi isihlanganiso sikhomba ukuhlangana kwemisho. Nokho kumelwe kucaciswe ukuthi nakuba kuliqiniso ukuthi kuhamanisa imisho, kumele kuvunywe nokuthi kuhamanisa nemiqondo okungenzeka ibe semishweni ehlukene. Nasolimini lwesiNgisi ukhona lomthetho abasawulandela othisha wokuthi ungaqalisi umusho ngesihlanganiso. Ababhali abangochwepheshe batholakele ezikhathini eziningi besebenzisa isihlanganiso ekuqaleni komusho ngempumelelo. Singabalula uNyembezi (1983: viii) lapho ethi "Kepha uma kusekhona esinamaqiniso ngakho, kufanele sikulobe phansi ukuze izizukulwane ezizayo ziwa fumanise amaqiniso ngoZulu eqoqiwe akhwezwa kahle." UNyembezi (1983: 2) futhi ubuye athi "Futhi phela izimbongi kwakungabantu ababenelungelo elingandile, ilungelo lokusho izinto noma zinganambitheki kahle enkosini, izinto omunye umuntu ayengenakuzisho adlule adle amabele." Sibuye sithole noHlengwa (2007: 61) ethi "Kodwa athi nje akaphindeli emotweni." Siyamthola futhi noMagagula (2021: 5-6) ethi "Kodwa lona akuwona nje umuzi wabantu, umuzi kadadewethu, igazi lami uqobo."

[1.5]

Ngabe lo mbiko ngokufunda kukaTizana nezingqinamaba ahlangabezane nazo ziwumbhalo wobuciko oseke washicilelwa? Ayiveziwe incwadi ocashunwe kuyo. Akuveli nasesingenisweni ukuthi kucwaningwa impilo kaTizana?

Kusobala ukuthi umhlaziyi akakuqondi ukusebenza kocwaningo ngendlela ye-*ethnography*. Le ndlela ivumela umcwaningi ukuba achaze ngokujulile abuye ahlaziye lokho akuchazayo ngendlela ebizwa ngokuthi ukuchaza okulugqinsi (*thick description*) (Cassar 2023). Ngakho lo mbuzo womhlaziyi ukhombisa ukungaqondisisi izindlela ezahlukahlukene zokubhala nokwenza ucwaningo. Indlela yokuchaza ngombambiqhaza ukuze uveze konke okuhlangene nocwaningo ijwayelekile uma usebenzisa indlela ye-*ethnography*. Le ndlela isebenze kakhulu esifundweni esicubungula amasiko nomlandokuhlala wabantu (*anthropology*). Esingababalula ekusebenziseni le ndlela singabala uGeertz (2005) lapho echaza kabanzi ngomkhuba wokuqhatha amaqhude eBali e-Indonesia. Siyamthola futhi futhi noCanagarajah (1999) eyisebenzisa le ndlela ocwaningweni lwakhe ngolimi lwesiNgisi olusetshenziswa abafundi ukuze bamelane nobukoloni.

[1.6]

Ucwaningo lwensiwa ngokwake kwabhalawa noma lokho okutholwe ucwaningo olwensiwe yilowo obhala isahluko. Uma lolu kuwucwaningo olwensiwe umbhali akuvele ukuthi ulwenze kanjani, mhlawumbe ngokumbuza imibuzo ethile. Uhla lwemibuzo nezimpendulo zikaTizana kufanele kuvela khona lapha ocwaningweni.

Lokhu kuphawula kukamhlaziyi kukubeka kucace ukuthi akaziqondi ezinye izindlela zokwenza ucwaningo. Umuntu ocwaninga ngokuphila kwabantu elandela i-*ethnography*, ufana nozicwilisa ekuphileni kwalabo abacwaningwayo aze abe yingxenye yabo okumniqesa amathuluzi okuchaza ngokujulile konke okwenzekayo okwembula ukuphila kwabantu. Umhlaziyi wazi indlela yokubuza imibuzo kuphela. Futhi sengathi umhlaziyi akakubambisisanga ukuthi uTizana lo, igama elinikezwe umbambiqhaza okungelona elakhe ngokwempela ukuze kube lula ukuxoxa ngokuhlaziya izigameko zokufunda nokufundisa kwakhe emfundweni ephakeme.

[1.7]

Kudinga ukulungiswa indlela yokucwaninga esetshenzisiwe

Okwenza umcwaningi ayale ukuthi kulungiswe indlela ucwaningo olwensiwe ngayo ukuthi aluhambisani nendlela ayijwayele. Lokhu kuvezwa ukuthi umcwaningi

akakubaluli ukuthi kushoda kuphi ukusebenzisa i-*ethnography* kodwa ubalula lokhu angakuboni.

5. Umhlaziyi wesibili

[2.1]

Iqoqa kumele lifake inhloso yephepha nokuthi limayelana nani, yimiphi imibuzo ezophenduleka. Iqoqa aliveze ukuthi yini etholakele.

Njengomhlaziyi wokuqala, lo wesibili ubalisa ngendlela iqoqa elimiswe ngayo elenza umhlaziyi angayiboni inhloso yephepha, okuqukethwe kanye nemibuzo okumele iphenduleke kanye nokutholakele. Nakuba eqinisile umhlaziyi kulokhu, akusho ukuthi yiyona ndlela kuphela yokubhala iqoqa. Maningi amaqoqa atholakala emaphepheni ahlukene kumajenali angakufaki konke lokhu okubalulwa umhlaziyi. Lapha singaphawula ngeqoqa lephepha elibhalwe uMbembe (2015) lapho ekhulumu ngokujika ubukoloni bokwazi kanye nombuzo wenqolobane. Iqoqa likaMbembe libalula kuphela ukuthi umbhalo wakhe ususelwa ezifundweni ayezenzisa eNyuvesi yaseWitwatersrand nokuthi uncike ezechlakalweni ezazenzeka eNingizimu Afrikha. Konke lokhu okubalulwa umhlaziyi akuveli nakancane eqoqeni likaMbembe.

[2.2]

Enjani incazelo ewugqinsi?

Lo mbuzo womhlaziyi ukhombisa ukungayazi indlela ye-*ethnography* esebenzisa incazelo ewugqinsi (*thick description*). Ukungayiqondi le ndlela ye-*ethnography* ehambisana nencazelo ewugqinsi kwenza kube lukhuni ukuyibona uma umcwaningi eseyisebenzisa.

[2.3]

Isabizwana sokukhomba siyehlukana negama esilandelana nalo.

Lo mbono womhlaziyi uyahambisana nendlela isiZulu okumelwe sibhalwe ngayo ngokwalesi sikhathi. Kodwa kumele sikubalule ukuthi kube nokuguquguquka kusukela onyakeni we-1934 lapho amagama ayebhalwa ngokwehlukanisa, kanti ngowe-1957/1962 kwalandela ukubhala ngokuhlukanisa noma ngokuhlanganisa; kanti kuzothi ngowe-1972 kube ukubhala ngokuhlukanisa; kwase kuthi ngowe-1993 kwaba ukubhala ngokuhlukanisa, njengalokhu kubika uMaphumulo (2021). IsiZulu besibhalwa ngongoti bengasehlukanisi isabizwana sokukhomba negama esilandelana

nalo. Lapha singabalula ukubhala kukaNyembezi (1983: ix) lapho ethi “Lencwadi iqukethe futhi nendaba yezibongo zamakhosi aseSwazini.”

[2.4]

Lugweme ulimi lokuhlonipha

Lokhu okushiwo umhlaziyi kucishe kuhambisane nendlela yokubhala ngolimi lwesiNgisi uma uletha umbiko ngocwaningo. Lokhu kuhambisana nendlela yokucwaninga encoma ukuthi umcwaningi angakhombisi ukuba yingxene yalokho akucwaningayo ukuze abike ngokungachemi. Ngaleylo ndlela, ulimi olusetshenziswa umbhali kumele luqonde lungavezi imizwa yomcwaningi. Kumele sikubalule lokhu ukuthi akuhambisani ncimishi nokusebenza kolimi lwesiZulu ikakhulukazi ukwambula ubunjalo bomuntu ongumZulu okuqukethwe olimini. Lapha singacaphuma amazwi kaMdlokombane iSilo uZwelithini kaBhekuzulu:

UMthiya usethubeni elihle hhayi nje ngokukwazi ukukhulumu ulimi ngoba engumZulu yena uqobo kodwa futhi uyaziqonda izimfumbe nemiyalezo efihlekile yalabo axoxisene nabo. Kuze kube namuhla AmaZulu angabaxoxi abakhulu kodwa umlayezo uyaye ulahleke ekuhumusheni. Abangaluncelanga lolu limi baba nengqinamba ophenywensi lwabo (Mbatha 2021: 9).

Kuyacaca ukuthi indlela ulimi olumi ngayo lwenza umuntu ovaluncela akwazi ukufunda lezo mfumbe eziqukethwe kokushiwyo nakulokhu okungashiwongo. Ngakho ulimi lokuhlonipha lusebenza ukufihla leyo miyalezo kwesinye isikhathi elahlekayo uma ingalethwanga ngolimi uluyifanele. Ngakho ukususa ulimi lokuhlonipha kumZulu akuhlukile nokususa ubuntu ngoba ukuhlonipha ngokwesiZulu kufaka ubuntu. Lokho kwenza kube sengathi ukubhala ngocwaningo kuphambene nobuntu.

Ngikubalulile futhi ukuthi ucwaningo olulandela *i-autoethnography* luyamvumela umcwaningi ukuzithoba nokuveza imizwa yakhe (Ellis nabanye 2010). Ngaleylo ndlela akonakele lutho ukuthi umbhali asebenzise ulimi lokuhlonipha.

[2.5]

Nikeza umthombo

Imithombo ibalulekile ekubhaleni ngombiko wocwaningo. Umbhali kumele acacise ukuthi lokhu akushoyo kuvela kuye noma kukhona lapha akucaphune khona. Kwesinye

isikhathi umuntu ubhala ngendlela emfikelayo angayicaphunanga ndawo kodwa abafundayo bangakholwa ukuthi umuntu angakususela ekhanda lokhu akushoyo engakufundanga ndawo.

[2.6]

Akuzwakali lokhu

Ukungazwakali kwengxenye ekhonjwe umhlaziyi kudalwe ukusebenzisa ulimi ngokungathekisa. Umhlaziyi ubonakala enenkinga uma ulimi luthe ukujiya. Into athi umhlaziyi ayizwakali ukukhuluma ngombambiqhaza njengengwevu ukukhombisa ububanzi nokujula kolwazi analo.

[2.7]

Lokhu akudingekile kuyaklanta

Ukuchaza sakwendlalela kubonakala kungahambisani nendlela umhlaziyi afunde ngayo. Indlela umhlaziyi ayilindele ukuba umuntu asuke ahlale endabeni okuyindlela enconywayo uma ubhala umbiko wocwaningo.

[2.8]

Akulona iqiniso lokhu. Bheka imisebenzi ephathelene nokuhelwa kolimi kwezemfundo. Ulimi lwesiZulu kufundiswa ngalo emabangeni aphansi

Lokhu alwisana nakho umhlaziyi ukuthi ulimi lwesiZulu alusetshenziswa ezikoleni ukufunda nokufundisa. Umhlaziyi ugxile emabangeni aphansi kuphela akabe esakubheka ukuthi uma abafundi beqeda ibanga lesithathu akekho osebenzisa isiZulu ukufunda nokufundisa. Empeleni lenkinga yokusetshenziswa kwezilimi zabomdabu emabangeni aphansi kuphela igcwele i-Afrikha yonke (Oloruntoba-Oju, Van Pinxteren noSchmied 2022). Lokhu kukhombisa ngokusobala ukubukela phansi izilimi zabomdabu.

[2.9]

Sebenzisa amagama aqondile hhayi awokuhlonipha

Lo mbono womhlaziyi uletha umbuzo wokuthi yini lena emkhathaza ngale ndlela ngokusetshenziswa kolimi lokuhlonipha. Okunye okungenzeka ukuthi umhlaziyi akacabangi ukuthi umbhalo wocwaningo kumele ufundwe ngabomdabu nabo bawuhlaziye ngendlela yesintu. Uma ukubalekela ukubhala ngendlela abomdabu abakhuluma nabaqonda ngayo, kusho ukuthi ubhalela abanye abantu, kanti futhi kungasho ukuzenzeza ngendlela ama-Afrikha abuka ngayo izinto.

[2.10]

Sebenzisa ulimi lwesiNgisi hhayi lukaKhwini

Umhlaziyi bekumele acacise ukuthi kunini lapho kuvumelekile ukukhuluma ngolimi lukaKhwini. Njengoba kumcacela umhlaziyi ukuthi ulimi lukaKhwini ulimi lwesiNgisi, kusiza bani ukusebenzisa ulimi lwesiNgisi kuphela?

[2.11]

Akube nenhlalanjalo. Uma usebenzise ulimi lomdabu Qhubeka nalo njalo ungabe ususebenzisa ulimi lwengabadi

Indlela uMaphumulo (2021: 96) abeka ngayo inhlalanjalo kulabo abahlela ulimi ukhuluma ngokuphathelene nenhlalanjalo yesipelingi neziphumuzi nokuzenza zivumelane nombhalo; inhlalanjalo yokubhala izinombolo; inhlalanjalo yokuqhathanisa okusembhalweni; ukubheka inhlalanjalo yokuhleleka kanye nokubaluleka komsebenzi wamathebula nezinombolo nalokhu okuphathelene nemifanekiso. Lapha umhlaziyi uncoma ukuthi uma kusetshenziswe igama elithize akumele usebenzise elinye. Lokhu akubonakali kuhambisana nokubhala okuhlwabusile nokuhehayo.

[2.12]

Awukwazi ukuqala umusho ngesihlanganiso

Akuqondakali kahle ukuthi kungani umhlaziyi aphawule ngalo mthetho, kanti futhi akucaci ukuthi uvelaphi. Isibonelo ukuthi uMaphumulo (2021: 71) uqalisa ngesihlanganiso lapho ethi “Kanti futhi yiwo lo moyo osisiza ekwakheni imisindo eyahlukene.” Esinye isibonelo sitholakala ekubhaleni kukaFuze (2023: xxiv) lapho ethi “Kepha abantu abamtsheli kahle lapha saphuma khona.” Singacaphuna futhi uMbatha (2021: 47) lapho ethi “Kanti enye yamadodana kaJobe eyayingathintekanga uMyaka waphila impilo ende eyayigcwele izigigaba.”

[2.13]

Akulona iqiniso lokhu

Kungenzeka ukuthi umhlaziyi unokudideka uma ephikisa ukuthi igama elethiwe umbambiqhaza akulona elakhe ngempela. Cishe umhlaziyi usola ukuthi umbhalu ucaphune indaba embhalweni thizeni obalula leli gama lombambiqhaza wase eshaya

sengathi uyaziqambela umbambiqhaza. Noma kungelula ukusekela lokhu kucabanga kuyamangalisa ukuthi umhlaziyi ukubona kungelona iqiniso lokhu okushiwo umbhali.

[2.14]

Isihloko asihambelani nokubhalwe

Into eyenza umhlaziyi angakuboni ukuhambisana kokubhaliwe nesihloko ukuthi kusetshenziswe incazeloe ewugqinsi *ye-ethnography* okusobala ukuthi umhlaziyi akayiqondi.

[2.15]

Kuzwakala kuwukuxoxa indaba esanganekwane lokhu.

Okwenza umhlaziyi ezwe incazeloe ewugqinsi izwakale njengenganekwane, ukungaqondi ukusebenza kwencazelo ewugqinsi esebeenze ngohlelo lokucwaninga *lwe-ethnography*.

[2.16]

Impilo ayinabo ubuningi

Lapha bekumele umhlaziyi acacise ukuthi kunini lapho impilo ingabuthathi ubuningi. Uma sikhululuma ngempilo esho ukungaguli noma esho ukuthi awufile, siyakwazi ukusebenzia ubuningi. Isibonelo esingasenza ukuthi “Selokhu kwahlasehla ubhubhane lomkhuhlane omkhulu, izimpilo zethu sezincikinciki.” Kanti uma sikhuluma ngempilo ekhomba ukunethezeka, sisebenzia ubunye. Lapha singasebenzia isibonelo esithi “Siphila impilo enzima”, angeke sithi “Siphila izimpilo ezinzima.”

[2.17]

Akuhlawumbiselwa ocwaningweni kepha kuhlaziywa ulwazi olutholakele

Umhlaziyi akabange esabheka konke okushiwo umbhali wamane wahlala phezu kwegama lokuhlawumbisela. Nokho alikho iqiniso kulokhu okushiwo umhlaziyi ngoba ukuhlawumbisela kuseyingxene yokucwaninga. Awuhlawumbiseli emoyeni kodwa ucwaningo lukuholela ekutheni ukwazi ukuhlawumbisela ngendlela ekhonjwa ucwaningo.

[2.18]

Kuyiphutha lokhu

Umhlaziyi uphikisa ukuthi esikhathini esedlule izikhungo zemfundo ephakeme zabantu abamnyama zazibizwa ngamakolishi asehlathini (Timis nabanye 2022). Kungenzeka

ukuthi umhlaziyi akanawo lowo mlando okwenza abone sengathi umbhali usenga ezimithiyo.

[2.19]

Akuhlangene nesihloko sakho lokhu

Akucaci kahle okwenza umhlaziyi angakuboni lokhu kuhlangene nesihloko. Okuvezwa umbhali yilokho okukhonjwa akutholile ekuhlaziyen i kwakhe impilo yombambiqhaza.

6. Umhlaziyi wesithathu

[3.1]

Ishloko sakho sihle kakhulu futhi siyaheha kepha asihambisan ncimishi nalokhu okubhale emzimbeni. Akukho lapho uchaza khona ngokwehlukana kwezilimi ekufundiseni umntwana e-Afrika. Okunalo kubhale wenabe ngezimo ezazibhekana nomlingiswa othile kwasengathi ubhala indaba elandisayo.

Umhlaziyi wesithathu naye akakuqondi ukucwaninga okulandela incazel ewugqinsi ye-ethnography. Kusengathi wehlulekile ukubona isizathu sokuxoxa ngocwaningo ngale ndlela nakuba umcwaningi enze isendlalelo sale ndlela. Lokhu kwehlukana kwezilimi ekufundiseni umntwana e-Afrikha kuqukethwe kuyo incazel ewugqinsi umhlaziyi ayibona njengendaba elandisayo.

[3.2]

Igama elithi Afrika alifikwa u (h) libhalwa kanjena Afrika. Kulungise lokhu kwisahluko sonke.

Kunomehluko phakathi kobhamu abangompheshethwa (ph, th, kh) kanye nobhamu abangebona ompshethwa kodwa abangoputshu (p, t, k). Isibonelo: -paka ≠ -phaka; -teta ≠ -thetha; -kala ≠ -khala. Ukukhombisa ukuthi umsindo ungumpheshethwa ongubhamu, kufakwa umsindo u 'h'. Ukubhalwa kwegama elithi Afrikha okunconywa umhlaziyi kulandela ulimi IwesiBhunu lapho kuze kususelwe khona i-Afrikaans (ulimi IwesiBhunu). Lo 'k' umhlaziyi akhuluma ngawo ufaka amagama esuselwa esiBhunwini afana nokat – ikati, kop – isikobho (ikhanda), njll. Ngakolunye uhlangothi u 'kh' lo ongafunwa umhlaziyi uyatholakala egameni lesiNgisi 'Africa'. Ukubizeka komsindo u 'ca' ku-Africa kuyahambisana no 'kha' ku-Afrikha. Kanti nokubizeka kwegama i-Afrikha esiZulwini kulandela umsindo ongumpheshethwa ongubhamu u 'kh' hhayi ubhamputshu u 'k'. Ngakho akucaci kahle ukuthi umhlaziyi ukususela kuphi ukuthi umsindo u 'h' awufakwa egameni elithi Afrikha.

[3.3]

Iyiphi indlelakubuka (paradigm) esetshenzisiwe noma elandelwa kuleli phepha?

Akucaci kahle hle ukuthi umhlaziyi uwubuzelani lo mbuzo ngoba lapho awubuze khona umbhali ukuvezile ukuthi indlela kubuka esetshenzisiwe ikhwalithethivu. Kungenzeka ukuthi umhlaziyi udidwe ukuthi umcwaningi ube eseveza ukuthi ngaphansi kwekhwalithethivu kulandelwe incazelo ewugqinsi ye-*ethnography*.

[3.4]

Iqoqa lakho aliveze isithombe esicacile sokuthi ikuphi okutholakele (findings), futhi yiziphi izincomo eliza nazo (recommendations).

Lokhu okuvezwa umhlaziyi kungenye yezindlela iqoqa okumele lime ngayo kodwa akuyona yodwa indlela. Mhlawumbe umhlaziyi ubelindele ukuthi umcwaningi abhale isihlokwana esithi ‘Okutholakele’ alandelise ngesinye isihlokwana esithi ‘Izincomo’. Noma kunjalo, umcwaningi ube esezengeza lezi zingxenye ezibalulwe umhlaziyi.

[3.5]

Iqoqa lakho usulifingqe kakhulu. Okungenani lenze libe ngamagama ayikhulu (100 words).

Okungenani umhlaziyi bekumele abalule okushodayo kunokukhathazwa ukufingqeka kweqoqa. Angeke kusize ukwelula iqoqa uma konke okufanele kube kulo kukhona. Lezi zingxenye ezinconywe umhlaziyi zibe sezilelula iqoqa lafinyelela emagameni anelisa umhlaziyi.

[3.6]

Veza kancane izindlela owazisebenzisa ukuqoqa ulwazi. (Qualitative/ quantitative).

Yonke lemidanti efunwa umhlaziyi eqoqeni ijwayelekile uma ubhala umbiko wocwaningo. Nakuba ukungabikho kwalezi zingxenye kungasho ukuthi iqoqa aliphelele, umcwaningi wazilandela izincomo zomhlaziyi.

[3.7]

Thasisela igama elilodwa kulawa ukuze abe mahlanu.

Nakuba umhlaziyi eyala ukuthi kwengezwe igama elilodwa kulawo asemqoka, asikho isidindo salokho. Empeleni maningi amaquoqa angenawo amagama asemqoka.

[3.8]

Olimini lwesiZulu onkamisa abalandelani. Bhala ukhonco lapha phakathi kwalamagama (-).

Uqinisile lapha umhlaziyi. Kepha kumele sikucacise ukuthi ngasekuqaleni kokubhalwa kolimi lwesiZulu onkamisa babelandelana. Lapha singabalula esinye sezithunywa zenkolo u-J.W. Colenso owabhalo incwadi yohlelo lwesiZulu ngonyaka we-1855 eyayilandelanisa onkamisa; isibonelo: ugmai, usaoti, aukho (Maphumulo 2021). Kepha u-A.T. Bryant ngonyaka we-1905 waphakamisa ukuthi kufakwe “usingankamisa uma imisindo engonkamisa isondelene futhi ingenakho ukuvaleka emphinjeni uma iphinyiswa” (Maphumulo 2021: 27). Ngaleyo ndlela la magama ayizibonelo uColenso ayewabhalo kulandelane onkamisa, uBryant wawabhalo aba ugwayi, usawoti, awukho. UMaphumulo (2021: 42) uncoma ukuthi ikhonco isetshenziswe emagameni okwethekela aqala ngonkamisa, isibonelo: e-India, e-Uganda, e-Oman.

[3.9]

Likhona igama lesiZulu elichaza itiyori, lithi insizakuhlaziya noma uthathe elithi injulalwazi.

Amagama aphakanyiswa umhlaziyi ashaya emhlolweni. Kepha nalo leli elisetshenziswe umbhali lamukelekile. Ngenxa yokuthi yigama elethekelwe esiNgisini, abanye balibhala libe ithiyori.

[3.10]

Lana bekufanele usinikeze isicaphuno esichaza kabanzi ngenjulalwazi eniyikhethile i-language ecology theory.

Isicaphuno esifunwa umhlaziyi sinikeziwe noma sinikezwe esigabeni lapha kuxoxwa kabanzi ngale njulalwazi. Umhlaziyi uphawula ngesicaphuno esingenisweni.

[3.11]

Izisombululo kufanele uzibhale ngasekugcineni kwesahluko sakho zikhipbe lapha.

Cishe umhlaziyi udidwe ukuthi umusho uqala ngegama elithi isisombululo akabe esabheka ukuthi okulandelayo kuthini. Kuyiqiniso ukuthi izisombululo kulindeleke zibe ngasekugcineni kwesahluko kodwa lapha akukhulunywa ngazo, kepha umusho nje kuphela ophawula ngokuthi ikuphi lapho isisombululo esingatholakali khona.

[3.12]

Siphi isahluko semibono yongoti? Lapho uzoveza khona ukuthi bathini ongoti/ababhali abahlukene ngesihloko obhala ngaso?

Okudide umhlaziyi lapha ukuthi asikho isihlokwana esithi ‘Imibono Yongoti’. Bekumele umhlaziyi akuqonde ukuthi imibono yongoti igcwele yonke indawo embhalweni. Zonke izinto umcwaningi azishoyo zesekekwe imibono yongoti, nezihlokwana azisebenzisile umcwaningi ziukethe imibono yongoti.

[3.13]

Bekungakuhle uveze nokuthi nalapha eNingizimu Afrika kunomthethosisekela ogunyaza ukulingana kwezilimi bese uyawucaphuna. Uphinde uveze ukuthi izikhungo zemfundo zinenqubo mgomo yolimi (Language Policy) egunyaza ubuliminingi okumele ilandelwe

Uqinisile lapha umhlaziyi. Umcwaningi ubhale ngamazwe athile ase-Afrikha eqhakambisa lokho akhulumu ngakho esihlokweni sakhe. Kepha akabange esaphawula ngeNingizimu Afrikha okungelinye lamazwe abalulekile e-Afrikha.

[3.14]

Lesi sihloko asishayi kahle. Mhlampe lapha bekufanele uthi insizakuhlaziya (Theory). Kubukeka sengathi ulwazi oluningi lukhulumu ngensizakuhlaziya.

Isihloko esichithwa umhlaziyi sifaka phakathi insizakuhlaziya esetshenzisiwe okwenza umhlaziyi abone yona yodwa. Umcwaningi unqume ukuthi angasishintshi isihloko ngokuphelele kodwa aveze insizakuhlaziya esihlokweni ngenxa yokuthi okuqukethwe kungaphezu kwensizakuhlaziya.

[3.15]

Qala umusho ngosoNhlamvukazi.

EsiZulwini yonke imisho iqalisa ngofeleba. Imithetho yokufelesa esiZulwini inakho ukudida. Isibonelo: kwabanye ondaweni ufeleba uba selungeni lokuqala emuva kukankamisa wokuqala wegama, njengokuthi eSikheleni; kanti uma la magama angondaweni engamagama ezikole, amaposi, iziteshi nezinye izindawo zomphakathi aqalisa ngofeleba, njengokuthi ESikhawini (Maphumulo 2021: 88). Lokhu kudala amaphutha okushiya ufeleba uma uhlamu olulandelayo lungufeleba.

[3.16]

Ngaphansi kwalesi sihloko bekufanele uqoqe lonke ulwazi oluvezza ukuthi izilimi zesiNtu zicindezeleke kagakanani emfundweni yasemabangeni aphakeme Isib. KwaZulu-Natali iningi labantu lisebenzisa ulimi lwesiZulu njengolimi lwasekhaya kepha zonke izikhungo zemfundo ephakeme ziludicilela phansi ekufundiseni zicheme nolwesiNgisi.

Lo mbono uvezwa ukuthi umhlaziyi akalandelanga indlela umcwaningi asebenzise ngayo incazelo ewugqinsi ye-ethnography. Ngakho lokhu okushiwo umhlaziyi angeke kusebenze kahle ngendlela umcwaningi ahlele ngayo umbiko wocwaningo.

[3.17]

Yenza isiqiniseko sokuthi uma ubhala igama lomuntu kwisahluko umetha igama okungesilona elakhe ngempela (pseudonym) bese ubhala eceleni kwalo ukuthi (igama okungesilo elakhe langempela).

Lokhu okushiwo umhlaziyi kuliqiniso. Empeleni umcwaningi uchazile esigabeni esingenhla ukuthi igama elethiwe umbambiqhaza akusilo elakhe ngempela. Mhlawumbe umhlaziyi ubelindele indlela ethile obekumelwe lokhu kubikwe ngayo.

[3.18]

Kususe konke lokhu ngoba sekuyindaba emfushane. Akudingeki lapha.

Lokhu athi umhlaziyi akususwe, incazelo ewugqinsi elandisa ngombambiqhaza ngokuhlaziya izigameko ezihambisana nesihloko socwaningo. Kuyacaca ukuthi umhlaziyi akayijwayele le ndlela, ubona sengathi kuxoxwa indaba. Umhlaziyi unendlela eyodwa ucwaningo olubhalwa ngayo okuthi uma umuntu engayilandelanga afane nogejayo.

[3.19]

Isampula lakho kumele licace ngeke kube umuntu oyedwa. Chaza ukuthi bangaki bangobani uveze nokuthi ubakhethet kanjani

Indaba yesampula ilawulwa uhlobo locwaningo. Akusilo iqiniso ukuthi angeke umuntu oyedwa abe isampula. Ukwelhuleka komhlaziyi ukulandela indlela yencazelo ewugqinsi yikho okwenza aphawule ngesampula nokukhetheka kwalo. Nakuba incazelo ewugqinsi ikhulumma ngombambiqhaza oyedwa, izigigaba zifaka abantu abanangi abathintekayo esihlokweni esicutshungulwayo. Konke lokhu kuyavela

encazelweni ewugqinsi. Okwenza umhlaziyi angakuboni lokhu ukuthi ubesevele eshilo ukuthi kumelwe kususwe lokhu ngoba akudingeki.

[3.20]

Lungisa lamakhasi engiwagqamisile abe sesimeni sesahluko se-Academic book.

Ngokukamhlaziyi, amakhasi awagqamisile afaka incazelo ewugqinsi athe ayisuswe ayifuneki lapha ngoba ngokwakhe ayikho esimweni se-Academic book. Baningi ababhalu abalandele le ndlela esingabalula uRyle (1949), uPonterotto (2006), noDrew (2023). Ngokuchaza kukaDrew (2023), incazelo ewugqinsi ifaka phakathi ukubhala izindaba ezineminingwane noma 'amavignette' echaza izimo kanye 'nomongo' wazo. Uphinde acacise uDrew (2023) ukuthi nakuba isuka ku-anthropology yezenhlalo, incazelo ewugqinsi manje isisetshenziswa njengendlela yokucwaninga eseizingeni eliphezulu emikhakheni eyahlukene yokufunda, okuhlanganisa isayensi yezokuhlalisana kwabantu, umlando, izifundo zamasiko, izifundo zemidiya, izifundo zemfundo, nokunye. Ngeshwa ukungayiqondi komhlaziyi le ndlela, kumenza angayiboni isesimeni se-Academic book.

[3.21]

Kungaba kuhle ukuthi ulisuse igama lomuntu kepha kepha uhlaziye ulwazi oluphathelene nokufunda nokufundiswa kwezilimi zesiNtu ezikhungweni zemfundo ephakeme.

Lokhu okushiwo umhlaziyi kusahambisana nokungayiqondisi incazelo ewugqinsi kanye nokucabanga ukuthi igama elisetshenzisiwe ngelombambiqhaza ngokwempela. Ukukhuluma ngegama lombambiqhaza elingelona elangempela kuyingxenyenye yokuhlaziya yingakho kungafanele liyekwe njengokuncoma komhlaziyi.

[3.22]

Lokhu kungakuhle ukubhale ngaphambi kokubhala isiphetho ukunike isihlokwana esithi izincomo/ iziphakamiso.

Lokhu okushiwo umhlaziyi kungenzeka uma ucwaningo lulandela indlela ayincomayo kusukela ekuqaleni. Indlela esetshenziswe umcwanangi iyakuvumela ukuthi lokhu umhlaziyi ancoma ukuthi kube nesihlokwana sakho kubhalwe esiphethweni.

7. Ingxoxo

Kunezinto abahlaziyi abathathu abuvumelana ngazo. Okukuqala bancoma ukuthi umbhali alungise iquoqa ukuze lifake izinto abazibona zishoda. Kuyabonakala ukuthi laba hlaziyi bafunde izindlela zokubhala iquoqa ezifana nale ephakanyiswa uGillett nabanye (2009). Uma iquoqa lingazifaki lezi zinto ezibalulwe uGillett nabanye, umhlaziyi ubona sengathi umbhali akazi ukuthi iquoqa libhalwa kanjani. Lokhu sikubona ngokuthi umhlaziyi aze anikeze isiboneko ukuthi umbhali abhale kanjani. Nakuba kunjalo, ziningi izindlela zokubhala iquoqa kwesinye isikhathi ezilawulwa uhlolo locwaningo. Umbhali kulolu cwaningo usebenzise indlela ebonakala ibadida abahlaziyi okwenza bayisole nendlela abhale ngayo iquoqa.

Okwesibili abahlaziyi bobathathu banokuvumelana ukuthi indlela umbhali asebenzise incazeloo ewugqinsi ayishayi khona. Babona sengathi umbhali ucaphune indaba eshicilelwe obekumele aveze umthombo lapho acaphune khona. Kokunye ukucabanga ukuthi umbhali uxoxa inganekwane okungabonakali ukuthi ihlanganaphi nesihloko okubhalwa ngaso. Kolunye uhlangothi ukubhala ngale ndlela kubonakala kungahambisani nokubhala emfundweni. Okudala le mibono yabahlaziyi ukungaqondi ukusebenza kwendlela ye-ethnography. Lokhu kubonakala ngokuthi la bahlaziyi abaphawuli lutho nge-ethnography, kunalokho, kuvela umbuzo wokuthi enjani incazeloo ewugqinsi. Ukuhlangana nemibono efana nale kunokwenza umbhali adikibale ngoba yena usuke azi ukuthi ucwaningo lwakhe lumi kanjani kodwa abahlaziyi babona engazi lutho.

Okunye abahlaziyi abavumelana ngakho ukubhalwa kolimi IwesiZulu njengokuthi isabizwana sokukhomba siyehlukana negama elilandelayo; umusho kumele uqale ngofeleba, nokuthi onkamisa abalandelani esiZulwini. Eminye imithetho efana nokuthi umusho awukwazi ukuqala ngesihlanganiso ibonakala ingahambisani nendlela ababhali abasebenzisa ngayo ulimi. Akuqondakali kahle hle ukuthi lo mthetho ususelwa kuphi. Kepha kunokusolakala ukuthi kungenzeka ukuthi uhambisana nomthetho othisha besiNgisi abawufafazayo ezikoleni nakuba nababhali abanangi besiNgisi bengawushayi ndiva.

8. Isiphetho

Leli phepha libheke imibono evezwe ngabahlaziyi lapho behlaziya isahluko esasibhalwe umcwaningi ngolimi IwesiZulu. Nakuba zikhona izingxenye zemibono

ekhuthaza ukuhlela kangcono ukubhaleka kwesahluko, ezinye izingxenye zikhombisa ukuthi abahlaziyi abanakho ukuqonda okupheleleyo ngendlela esetshenziswe umcwaningi. Lokhu kwenze ukuthi bancome ukuthi umbhali ashintshe indlela acwaninge ngayo. Kuyabonakala ukuthi imibono efana nale inokwenza ukuthi ababhali badikibale ikakhulu uma bekubona kungumqansa ukuchazela abahlaziyi indlela abayilandele ocwaningweni lwabo.

Imithombo esetshenzisiwe

- Bailey, S. 2006. *Academic writing: A handbook for international students*. London: Routledge
- Beekman, L., Dube, C., Potgieter, H. & Underhill, H. (Eds.) 2016. *Academic literacy*. Cape Town: Juta
- Cassar, C. 2023. Clifford Geertz and the thick description of the Balinese Cockfight. *Anthropology Review*. <https://anthropologyreview.org/anthropology-explainers/clifford-geertz-thick-description-balinese-cockfight/> [Accessed: 14 December 2023.]
- Canagarajah, A.S. 1999. *Resisting linguistic imperialism in English teaching*. Oxford: OUP
- Drew, C. 2023. 5 Key principles of ‘thick description’ in research. *Helpful Professor*.<https://helpfulprofessor.com/thick-description/> [Accessed: 15 December 2023.]
- Ellis, C.; Adams, T.E. & Bochner, A.P. 2011. Autoethnography: An overview. *Historical social research/Historische sozialforschung* 36(4): 273-290.
<https://doi.org/10.12759/hsr.36.2011.4.273-290>
- Fuze, M.M. 2022. *Abantu abamnyama lapa bavela ngakona*. Pietermaritzburg: UKZN Press
- Geertz, C. 2005. Deep play: Notes on the Balinese Cockfight. *Daedalus* 134(4), 56-86.
<http://www.jstor.org/stable/20028014>
- Gillett, A., Hammond, A. & Martala, M. (Eds.) 2009. *Inside track: Successful academic writing*. London: Longman
- Hlengwa, M. 2007. Isililo esikhulu. In Hlengwa, M., Mathenjwa L. noQwabe, T. (Abahleli), *Amagemfe*, pp. 59-65. Cape Town: Via Afrika
- Jansen, J.D. 2019. *Decolonization in universities*. Johannesburg: Wits University Press
- Magagula, Z. 2021. *OMaSibalukhulu*. Hilton: PEZ Publishers

- Maphumulo, A.M. 2021. *Ukuvamisa imithetho yokubhala nobhalomagama lwesiZulu lonyaka wezi-2021*. Pietermaritzburg: UKZN Press
- Maunganidze, F. & Ruggunan, S. 2021. Improvising ethics? A collaborative autoethnographic account of the challenges faced when doing field research in Zimbabwe. *African Journal of Inter/Multidisciplinary Studies* 3(2021a Special Issue): 38-50. <https://doi.org/10.51415/ajims.v3i1.969>
- Mbatha, S. 2021. *UZulu: Umlando nobuqhawe bukaZulu*. Johannesburg: IZigi Publishing
- Mbembe, A. 2015. Decolonizing knowledge and the question of the archive. <https://worldpece.org/content/mbembe-achille-2015-'decolonizing-knowledge-and-question-archive'-africa-country>. [Accessed: 14 December 2023.]
- Ntombela, B. 2021. My trepidation: Personal ethical pitfalls and dilemmas in the scholarship of teaching and learning. *African Journal of Inter/Multidisciplinary Studies* 3(2021a Special issue): 13-25. <https://doi.org/10.51415/ajims.v3i1.967>
- Ntombela, B. 2023. The sociolinguistic problems of English medium instruction in the Middle East and North Africa: Implications for epistemic access. *Frontiers in Psychology* 14. <https://doi.org/10.3389/fpsyg.2023.1084626>
- Nyembezi, S. 1983. *Izibongo zamakhosi*. Pietermaritzburg: Shuter & Shooter
- Oloruntoba-Oju, T., Van Pinxteren, B. & Schmied, J. (Eds.) 2022. *Language of education and development in Africa: Prospects for decolonization and empowerment*. Gottingen: Cuvillier Verlag
- Ponterotto, J. G. 2006. Brief note on the origins, evolution, and meaning of the qualitative research concept thick description. *The Qualitative Report* 11(3): 538-549. <https://doi.org/10.46743/2160-3715/2006.1666>
- Ryle, G. 1949. *Concept of the mind*. New York: Hutchinson and Company.
- Sanon-Ouattara, E. 2022. Linguistic and cultural barriers to learning and development in Africa: The example of Burkina Faso. In Oloruntoba-Oju, T. Van Pinxteren, B. & Schmied, J. (Eds.) 2022. *Language of education and development in Africa: Prospects for decolonisation and empowerment*, pp. 55-72. Gottingen: Cuvillier Verlag
- Timis, S., De Vet, T., Naidoo, K., Trahar, S., Lucas, L., Mgqwashu, E., Muhuro, P. & Wisker, G. (Eds.) 2022. *Rural transitions to higher education in South Africa: Decolonial perspectives*. London: Routledge

ABOUT THE AUTHOR

Berrington Xolani Siphosakhe Ntombela

University of Limpopo

Email: Berrington.Ntombela@ul.ac.za ORCID: <https://orcid.org/0000-0002-8099-402X>

Prof. Ntombela is an Associate Professor in English Studies at the University of Limpopo. He is former Head of the Department of English at the University of Zululand. He also worked at SABIS University of Erbil in Kurdistan as Head of English Department and previously held the position of Senior Lecturer at Caledonian College of Engineering in Oman.
